

# Realiti Semasa Penggunaan Dinar Emas di Malaysia

SALMY EDAWATI YAACOB & HAILANI MUJI TAHIR

## *Abstrak*

Dinar emas merupakan syiling emas yang telah diguna pakai sebelum zaman Islam dan diterima penggunaannya pada zaman Rasulullah s.a.w, sahabat dan para tabiin sehingga ia dikenali sebagai mata wang umat Islam. Penggunaannya berterusan sehingga zaman kejatuhan kerajaan Turki Uthmaniah pada tahun 1924. Manakala dinar emas zaman moden mula ditempa pada tahun 1992 di Dubai dan cadangan untuk memartabatkan kembali penggunaannya mula dibahaskan setelah negara-negara ASEAN dilanda krisis mata wang yang teruk pada tahun 1997/98. Justeru, kajian ini cuba mendedahkan semua aplikasi semasa dinar emas yang telah diamalkan di Malaysia setelah 10 tahun cadangan dibuat. Hasil kajian ini menunjukkan bahawa terdapat beberapa penggunaan dinar emas antaranya sebagai mata wang fizikal dan sistem pembayaran elektronik (e-dinar), pelaburan, simpanan, urusan haji, pembayaran zakat, cenderamata dan sebagai hantaran perkahwinan. Kajian ini telah membuktikan bahawa dinar emas sudah mula diterima oleh sebahagian masyarakat Malaysia dan sekali gus usaha memartabatkan penggunaannya boleh direalisasikan.

## Pendahuluan

Isu untuk memartabatkan kembali penggunaan dinar emas ini mula dibincangkan secara meluas dalam tahun 1998-2002 iaitu sewaktu negara-negara Asia dilanda krisis mata wang yang teruk. Pada tahun 2001 Tun Dr. Mahathir Mohammad, bekas Perdana Menteri Malaysia telah mengutarakan cadangan kepada OIC bagi menggunakan dinar emas dalam perdagangan antarabangsa. Saranan dan usaha beliau ini telah membuka mata kepada penganalisis ekonomi, ahli akademik dan para cendekiawan Islam untuk meneliti dan mengkaji kewajaran penggunaan kembali dinar emas di abad ini.

Sehingga kini terdapat beberapa alternatif penggunaannya yang telah dicadangkan dan dilaksanakan iaitu penggunaan dinar emas dalam perdagangan antarabangsa, sistem pembayaran elektronik (e-dinar), pelaburan, simpanan, pembayaran zakat, cenderamata dan sebagai hantaran perkahwinan. Bermula tahun 2001 sehingga sekarang terdapat banyak seminar, bengkel dan forum telah di adakan bagi mencari mekanisme yang sesuai untuk memartabatkan semula penggunaan dinar emas. Nama-nama seperti Tun Dr. Mahathir Mohammad, Profesor Dr Umar Ibrahim Vadillo, Profesor Madya Dr Ahamed Kameel Mydin Meera, Syaikh Abdul Kadir al-Murabit, Syaikh Imran N. Hosein adalah merupakan individu yang banyak terlibat dalam mempromosi dan melaksanakan dinar emas di Malaysia khususnya dan di dunia amnya.

## Penempaan Dinar Emas

Selepas kejatuhan kerajaan Turki pada tahun 1915, maka berakhirilah dinar emas dan dirham perak dalam sistem kewangan dunia. Menurut Umar Ibrahim Vadillo (2002) dinar emas dunia moden pertama telah ditempa dan dilancarkan pada 7 November 2001 oleh Islamic Mint yang bergabung dengan Thomas Cook Rostamani Exchange Company dan Dubai Islamic Bank di Amiriah Arab Bersatu (UAE). Dinar emas ini boleh diperoleh dari cawangan-cawangan Thomas Cook Rustamani Wxchange Company dan Dubai Islamic Bank di semua 7 negara UAE (Rosli Yaacob 2007). Menurut Dr. Zeno Dahinden<sup>1</sup> (2008) sehingga hari ini terdapat lima kilang dinar emas di dunia iaitu di Dubai, Sepanyol, Afrika Selatan, Amiriah Arab Bersatu dan Indonesia.<sup>2</sup> Manakala Royal Mint of Malaysia pula merupakan pengeluar dinar emas pertama di Malaysia (Utusan Malaysia 2008 22 Januari). Dinar emas Royal Mint dilancarkan pada 27 Julai 2003 di Shah Alam. (Zeno Dahinden. 2008). Selain itu, terdapat juga Dinar Emas Kelantan (DEK) yang dirasmikan penggunaannya pada 21 Mei 2006. DEK adalah kelolaan kerajaan Negeri Kelantan di bawah kendalian Kelantan Golden Trade. Manakala yang terkini adalah Dinar Emas Public Gold yang mula dikeluarkan pada November 2008 oleh Public Fine Gold International Sdn Bhd.

## Aplikasi Semasa Dinar Emas Di Malaysia

### Dinar Emas dalam Perdagangan Antarabangsa

Pada peringkat permulaan penggunaan dinar emas, Tun Dr Mahathir Mohamad menyarankan supaya dinar emas digunakan dalam perdagangan antarabangsa melalui Sistem Pembayaran Dua Hala (BPA) dan Pelbagai Hala (MPA). Sebelum ini Malaysia telah menandatangani perjanjian BPA dengan 24 buah negara dan berhasrat dapat menggunakan konsep dinar emas dengan ke semua negara tersebut. Tan Sri Nor Mohamed Yakcop selaku Menteri Kewangan II Malaysia pada masa itu telah diamanahkan untuk mengetuai misi ini. Penggunaan dinar emas dalam BPA melibatkan perdagangan antara dua negara, dan setakat ini sudah terdapat tiga buah negara yang berminat dan bersetuju untuk berdagang dengan Malaysia melalui penggunaan dinar emas iaitu Iran, Bahrain dan Sudan (Utusan Malaysia 2002 02 Mei).

Menurut kertas cadangan Tan Sri Nor Mohamed Yakcop (2002) proses pelaksanaan BPA adalah melibatkan dua buah negara yang bersetuju menjalankan urusan import eksport. Perbezaan jumlah eksport dan import antara negara inilah yang akan dinilai dalam dinar emas. Sebagai contoh; syarikat A di Malaysia mengeksport getah ke syarikat C di Arab Saudi sebanyak satu juta dolar AS. Syarikat C akan membuat pembayaran dalam bentuk rial kepada Bank pusat Arab Saudi dan bank pusat menukarkannya dalam bentuk dolar AS untuk dibayar kepada bank pusat Malaysia. Syarikat A akan menerima bayaran tersebut dalam ringgit Malaysia daripada Bank Negara Malaysia (BNM). Begitu juga sebaliknya apabila Syarikat B dari Malaysia mengimport minyak mentah daripada syarikat D di Arab Saudi sebanyak 500,000 dolar AS. Masing-masing akan membuat dan menerima bayaran dalam bentuk mata wang negara masing-masing. Perkembangan perdagangan akan dinilai tiga bulan sekali. Selepas tiga bulan Arab Saudi berhutang dengan Malaysia sebanyak 500,000 dolar AS. Maka, di sinilah peranan dinar emas di mana penjelasan baki tersebut akan dinilai dalam dinar (mengikut harga emas semasa). Penjelasan ini akan dibuat di Bank of England<sup>3</sup> yang berperanan memindahkan jumlah tersebut daripada akaun simpanan emas Arab Saudi ke akaun simpanan emas Malaysia sebanyak nilai dinar yang bersamaan 500,000 dolar AS tadi.

Ahamed Kameel Mydin Meera (2002) menyokong kaedah ini dan menganggap ia sebagai satu sistem yang adil kerana lebih nilai dagangan dinilai dengan harga semasa emas yang lebih stabil berbanding

wang fiat dan ini tidak akan merugikan mana-mana negara. Ia juga akan menjadi satu alternatif untuk menghapuskan kebergantungan kepada US dolar dalam perdagangan antarabangsa dan ini akan memberi kelebihan kepada negara-negara kecil (Hassanuddin 2004). Semua negara boleh menyertai sistem ini walaupun tidak mempunyai simpanan dinar yang banyak (Ahamed Kameel 2002).

Noradli Ridzwan Shah Mohd Dali et al. (2004) juga menjelaskan bahawa sistem BPA praktikal untuk dilaksanakan dengan menggunakan dinar emas kerana ia menguruskan transaksi dalam skala besar antara pengeksporth dengan pengimport. Barang-barang yang diimport oleh pengimport akan dijual dalam negara kepada pengguna akhir. Seterusnya, pemborong dan peruncit boleh membeli daripada pengimport ini dan mereka tidak berurusan menggunakan mata wang emas tetapi dalam mata wang tempatan sebelum barangan tersebut diedarkan kepada pengguna. Sekiranya penggunaan e-dinar dalam e-commerce mendapat sambutan masyarakat umum, maka tidak mustahil sistem pembayaran elektronik yang menggunakan emas sebagai dinominasi mata wang akan menjadi realiti di dalam sistem perdagangan antarabangsa. Beliau juga menyatakan ciri-ciri sistem BPA yang menggunakan dinar emas iaitu:

- a. Pengimport dan pengeksporth diawasi oleh bank pusat.
- b. Pengimport dan pengeksporth boleh menggunakan kemudahan bank untuk menguruskan urus niaga mereka.
- c. Tidak menggunakan fizikal emas sebagai pemindahan baki, hanya jika perlu sahaja.
- d. Tiada kerugian dalam pertukaran dan risiko mata wang.
- e. Pelaksanaannya hampir sama dengan BPA biasa cuma ia menggunakan denominasi emas.
- f. Ia dibentuk mengikut prinsip syariah.
- g. Sesuai kepada pengimport dan pengeksporth besar dalam pasaran.
- h. Mengadakan hubungan dengan pasaran bebas dan meluaskan jaringan perdagangan serta meningkatkan hubungan kerjasama dengan pihak bank.
- i. Jaminan bayaran oleh pengeksporth dalam Ringgit tanpa ada risiko hutang.
- j. Mengurangkan kos transaksi dan mempromosi kerjasama ekonomi antara negara.

Namun, sehingga sekarang sistem ini masih belum dapat dilaksanakan walaupun pernah dihebohkan pelaksanaannya sudah bermula pada Oktober 2003.<sup>4</sup> Menurut Mahathir Mohamad (2005) sistem ini tidak dapat dijalankan kerana negara-negara OIC masih belum

bersedia dan tiada keyakinan untuk menggunakan dinar emas dalam perdagangan. Noradli Ridzwan Shah Mohd Dali et al 2004 berpendapat bahawa terdapat 3 faktor penting yang menghalang negara-negara OIC memberi kerjasama dalam hal ini iaitu terdapat perbezaan keadaan ekonomi antara negara, pergolakan politik dan kemudahan infrastruktur yang terhad. Buat masa ini hanya empat negara yang menunjukkan minat kepada penggunaan dinar emas iaitu Malaysia, Iran, Bahrain dan Sudan. Mata wang dwi sistem akan digunakan sekiranya empat buah negara tadi mengadakan perdagangan dengan negara yang tidak menggunakan dinar emas. Penggunaan dinar emas dalam perdagangan antarabangsa masih gagal dilaksanakan juga disebabkan masyarakat sudah sebatu dengan sistem sedia ada dan sukar untuk menerima mata wang dalam bentuk emas dan perak.

### Dinar Emas Sebagai Sistem Pembayaran Elektronik- E-Dinar Ltd dan Web Dinar System

Sehingga hari ini di Malaysia sudah terdapat beberapa transaksi urusan niaga yang dijalankan menggunakan unit dinar melalui sistem pembayaran elektronik. Antara sistem telah diaplikasikan ialah sistem E-Dinar yang dibangunkan oleh E-Dinar Ltd. Manakala Web Dinar akan mula beroperasi pada September 2009.

#### E-Dinar

E-dinar ialah satu sistem pembayaran dan pertukaran elektronik menerusi internet. E-dinar beroperasi dalam e-dagang yang mana urusan jual beli online dilakukan dalam nilai emas dan perak. Istimewanya sistem e-dinar kerana ia disokong oleh 100% emas dan perak fizikal.<sup>5</sup> Unit yang digunakan ialah e-dinar dan e-dirham. Fizikal emas dan perak yang menyokong unit-unit e-dinar dan e-dirham ini akan sentiasa sama nilai atau lebih daripada unit-unit e-dinar dan e-dirham dalam edaran. Setiap unit elektronik e-dinar bersamaan dengan berat tepat dan tetap 4.25 gram emas tulen 24k (Zeno Dahinden. 2008).

Ahamed Kameel Mydin Meera (2002) menganggap inovasi baru penggunaan dinar emas ini adalah untuk mengelakkan pegangan emas ke merata tempat, dan sekali gus untuk kemudahan dan keselamatan pengguna. Sistem kad seperti debit dan kredit kad juga akan diserapkan ke dalam sistem pembayaran elektronik gold dinar ini. Pemegang akaun e-money sememangnya boleh menukarkan nilai dalam bentuk emas.

Sistem e-Dinar diasaskan pada bulan Ogos 2000 di Labuan, Malaysia<sup>6</sup> dan berpusat di Dubai Corporation, Dubai (Zeno Dahinden. 2008).

Sehingga hari ini E-dinar Ltd mempunyai kira-kira AS\$10 juta duit syilingnya dalam edaran di seluruh dunia dan AS\$40 juta lagi atau hampir empat tan emas dalam sistem e-dinar (Utusan Malaysia 2008. 22 Januari). Emas dan perak fizikal bagi sistem e-dinar disimpan oleh Emirates Gold DMCC di Dubai dan Embraport di Switzweland. Jumlah pemegang akaun sistem e-dinar sehingga bulan Jun 2008 mencatatkan bilangan seramai 9000 orang dan 6000 daripadanya merupakan ahli aktif yang mempunyai kedua-dua akaun iaitu akaun e-dinar dan e-dirham (Zeno Dahinden. 2008).

Kelebihan sistem e-dinar menurut Zeno Dahinden (2008):

- a. Satu sistem pembayaran dan pertukaran yang halal dan dibentuk mengikut kehendak syariah.
- b. Nilai e-dinar dan dirham disokong 100% dengan nilai fizikal emas dan perak.
- c. Yuran yang dikenakan hanya 1% dari jumlah transaksi tetapi maksimum 0.015 (-1.90 USD) bagi transaksi e-dinar dan maksimum untuk dirham adalah 0.5 (0.88 USD) bagi e-dirham.
- d. Pembayaran segera tanpa penangguhan dan berlaku pada masa yang sebenar (*real time*) secara terus tanpa melibatkan institusi perbankan ataupun orang tengah.
- e. Pemegang akaun e-dinar diberi pilihan sama ada untuk menukarkan e-dinar dan e-dirham dalam bentuk mata wang kertas ataupun ditukar dengan fizikal emas.
- f. Nilai aset yang terjamin tanpa ada risiko susut nilai.

Muhammad Nasri & Ishak (2004) mencadangkan penggunaan kad pintar dalam e-dinar. Penggunaan kad pintar yang dicadangkan ini adalah sebagai alat penggunaan harian. Nilai yang terdapat dalam kad pintar adalah mewakili nilai dinar emas yang dimiliki di dalam akaun e-dinar. Pengguna hanya perlu membawa kad pintar atau kad debit ini untuk menjalankan urusan niaga harian. Kad pintar ini berperanan seperti wang kertas pada hari ini cuma bezanya ia mempunyai sokongan emas fizikal di dalam bank.

### Sistem Web Dinar

Web Dinar ialah satu sistem perdagangan *online* yang menggunakan nilai dinar emas dalam transaksi pembayaran. Matlamat utama pembangunan sistem ini adalah untuk mewujudkan satu sistem perdagangan secara

*online* yang mengikut prinsip syariah dengan mempromosi penggunaan mata wang Islam iaitu dinar emas sebagai satu transaksi yang halal ([www.webdinar.com](http://www.webdinar.com)).

Sistem web dinar ini menghasilkan 4 cabang utama iaitu:

- i. Portal D2D.
- ii. Kad Dinar (Pendaftaran ahli).
- iii. Mata Wang Dinar Emas (isian semula nilai/*top up*).
- iv. Kad Pembayaran Dinar (menentu sahkan bayaran).

Sebagai permulaan dalam melaksanakan sistem ini, kad dinar emas Islam (IGD) akan ditawarkan kepada pelanggan Bank Islam. Keunikan kad ini ialah:

- i. Mengikut prinsip syariah
- ii. Tidak akan mewujudkan inflasi, manipulasi dan spekulasi

Penggunaan kad IGD untuk barangan dan perkhidmatan yang ditawarkan di bawah Bank Islam akan memberi faedah kepada kedua-dua pihak iaitu bank dan pemegang kad. Nilai kad ini boleh digunakan sama ada untuk pembelian barangan dan perkhidmatan Islam ataupun untuk mengekalkannya sebagai satu pelaburan. Ini kerana nilai emas tidak sama dengan nilai mata wang kertas yang tidak akan susut nilai dengan inflasi. Di samping itu juga pelanggan (*depositor*) Bank Islam juga akan ditawarkan kad IGD sebagai satu alternatif pembayaran untuk menunaikan haji di Makkah.

## Pelaburan Dinar Emas

Pelaburan yang berasaskan dinar emas di Malaysia dikendalikan oleh e-Qirad Sdn Bhd dan Public Fine Gold International Sdn Bhd.

### E-Qirad Sdn Bhd

E-Qirad Sdn Bhd merupakan anak syarikat Islamic Mint yang bertanggungjawab dalam penempatan dinar emas di Dubai. E-Qirad Sdn Bhd melantik wakala-wakala (agen) di seluruh dunia bagi mengendalikan pelaburan dinar emas (Zuhaimy Ismail 2003, Umar Ibrahim Vadillo 2002). Pelanggan yang membuka akaun simpanan dinar emas berpeluang untuk menyertai pelaburan yang dinamakan Islamic Hybrid Instrument (IHI). Simpanan minima yang diperlukan untuk menyertai pelaburan ini ialah 25 Dinar bagi individu dan 100 Dinar bagi syarikat dan koperasi

(KPMJ Gold Sdn Bhd. 2006). Pelabur ditawarkan dengan 2 pilihan pelaburan yang menawarkan pulangan pelaburan yang menarik. Pelaburan dinar emas adalah berlandaskan prinsip mudarabah. Contoh pelaburan dinar emas yang dikendalikan oleh Koperasi Permodalan Melayu Johor<sup>7</sup> adalah seperti berikut (KPMJ Gold Sdn Bhd. 2006):

*Pilihan 1:*

- i. Modal dan keuntungan ditambah pada harga dinar yang dibeli pada awal pelaburan. Ini bermakna harga dinar emas pelabur tidak akan berubah sepanjang tempoh pelaburan. Pelabur tidak perlu risau tentang perubahan harga emas di pasaran dunia.
- ii. Kadar keuntungan antara 8% hingga 9% setahun (anggaran paling minimum).
- iii. Tempoh pelaburan ialah 24 atau 36 bulan.
- iv. Keuntungan dibayar dalam ringgit Malaysia setiap bulan. Keuntungan mula dinikmati sebulan selepas pelaburan bermula.
- v. Modal pelaburan akan dipulangkan dalam nilai ringgit Malaysia setelah tamat tempoh pelaburan.
- vi. Modal pelaburan adalah terjamin.

*Pilihan 2:*

- i. Modal dan keuntungan bergantung pada harga pasaran semasa. Harga dinar pelabur berubah mengikut harga pasaran emas semasa dunia.
- ii. Kadar keuntungan ialah 11% setahun (anggaran paling minimum).
- iii. Tempoh pelaburan ialah 12 bulan, 24 atau 36 bulan.
- iv. Keuntungan dibayar dalam dinar emas setiap bulan dan dikreditkan ke akaun dinar pelabur di KPMJ Gold.
- v. Modal pelaburan akan dipulangkan dalam bentuk dinar emas selepas tamat tempoh pelaburan.
- vi. Modal pelaburan terjamin (nilai ringgit Malaysia bergantung pada harga pasaran semasa dinar emas )

Public Fine Gold International Sdn. Bhd.

Merupakan sebuah syarikat<sup>8</sup> yang membuat aktiviti menjual dan membeli emas untuk pelaburan dengan harga menarik dan kualiti 24K. Ia menawarkan syiling emas dan jongkong emas kepada pembeli. Untuk syiling emas terdapat syiling emas Public Gold 50 gram (emas 24K) dan Dinar Emas Public Gold manakala bagi jongkong emas pula, terdapat dalam saiz 20 gram, 50 gram dan 1 Kg (emas 24K).<sup>9</sup> Dinar emas Public



Gold merupakan produk terbaru yang dikeluarkan dalam 3 nilai iaitu 1 dinar, 5 dinar dan 10 dinar.

Gambar 3.1 : Spesifikasi Dinar Emas PublicGold

	1 Dinar	5 Dinar	10 Dinar
<b>Bentuk</b>			
<b>Diameter</b>	20mm	32mm	38mm
<b>Logam</b>	Emas	Emas	Emas
<b>Berat</b>	4.25 gram	21.25 gram	42.5 gram
<b>Ketebalan</b>	0.72mm	1.5mm	2.18mm
<b>Ketulen</b>	916.6	916.6	916.6

Sumber: Laman web Public Gold [www.publicgold.com.my](http://www.publicgold.com.my), 9 Jun 2009

Gambar 3.3: Sijil Ketulenan Dinar Emas Public Gold<sup>10</sup>



Sumber: Lamanweb Public Gold [www.publicgold.com.my](http://www.publicgold.com.my), 9 Jun 2009

Simpanan dinar emas sebagai aset juga merupakan satu pelaburan yang baik berbanding dengan pelaburan-pelaburan biasa yang tidak berasaskan emas. Pelaburan dinar emas akan memberi jaminan nilai dan lebih selamat (Zuhaimy 2003). Umar Azmon (2002)<sup>11</sup> menyatakan 10 sebab untuk masyarakat memilih emas sebagai pelaburan:

- i. Tiada risiko kehilangan semua wang walaupun nilai pasaran emas sentiasa berubah.
- ii. Kadar pertukaran lebih perlahan dan stabil berbanding dengan pelaburan instrumen lain.
- iii. Tidak membawa risiko kredit dan merupakan aset yang selamat.
- iv. Emas lebih cair berbanding aset alternatif lain.
- v. Emas bukan tanggungan sesiapa.
- vi. Mempunyai rekod jangka panjang yang baik dalam mengekalkan nilai sebenar.
- vii. Selamat dan aset kewangan yang terjamin.
- viii. Komoditi yang bernilai dan kukuh yang mempunyai potensi untuk nilai yang sentiasa meningkat.
- ix. Digunakan sebagai alat terhadap inflasi.
- x. Satu objek perhiasan dan kecantikan yang tiada tandingan.

### Dinar Emas dalam Pembayaran Zakat, Menunaikan Haji dan Hantaran Perkahwinan

Dinar Emas Kelantan (DEK) yang dilancarkan pada 21 Mei 2006 telah memberi peluang kepada rakyat Kelantan khasnya dan masyarakat Malaysia amnya dalam menikmati kelebihan dinar emas dalam pelbagai aktiviti. DEK dapat digunakan sebagai simpanan, pelaburan, pembayaran zakat, cenderamata dan sebagai hantaran perkahwinan. Kelantan menjadi negeri pertama di Malaysia yang menerima pembayaran zakat dalam bentuk dinar emas. Masyarakat Kelantan boleh membayar zakat dan mendapatkan dinar emas di semua 8 cawangan kedai gadaian Islam Kelantan ([www.dinarkel.com](http://www.dinarkel.com) 23 Sept 2008). Di Indonesia juga sudah terdapat beberapa tempat yang menerima dinar emas sebagai alat bayaran zakat dengan mewujudkan *wakala* atau institusi khas (Luthfi 2007).

Manakala penggunaan dinar emas sebagai hantaran perkahwinan juga sudah mula diamalkan oleh segelintir masyarakat di Malaysia. Pada tahun 2001 pasangan artis Malaysia, M.Nasir dan Marlia Musa menjadi pasangan terawal yang menjadikan dinar emas sebagai mas kahwin (*Utusan Malaysia* 2001)

### Penutup

Krisis kejatuhan mata wang Asia pada tahun 1997 telah memberi hikmah yang besar kepada umat Islam apabila isu penggunaan kembali mata wang Islam yang mempunyai nilai hakiki (*intrinsic value*) adil, stabil,

tanpa riba dan *gharar* mula dibincangkan kembali. Cadangan penggunaan dinar emas mula disarankan oleh bekas perdana Menteri Malaysia, Tun Dr. Mahathir Muhammad pada masa itu dan isu ini mula diberi perhatian oleh ahli ekonomi dan ahli ulama' Malaysia. Rentetan daripada itu, penempaan dinar emas mula dilakukan di Malaysia yang dimulai dengan Islamic Mint, Royal Mint dan yang terkini Kelantan Golden Trade (dinar emas Kelantan). Penempaan ini dipandang positif dalam merealisasikan penggunaan dinar emas kerana ia merupakan langkah pertama dalam memperkenalkan dan mempromosi dinar emas kepada rakyat Malaysia. Apabila kepingan dinar emas mula beredar, pelbagai kaedah penggunaannya mula diperkenalkan antaranya ialah; sebagai mata wang dan transaksi pembayaran elektronik (e-Dinar dan Web Dinar), pembayaran zakat, urusan haji, pelaburan, simpanan, hadiah dan sebagai hantaran perkahwinan. Perkembangan penggunaan dinar emas di Malaysia dipandang positif apabila penggunaannya sentiasa diperluas dan dipelbagaikan dari semasa ke semasa.

### Nota Hujung

- 1 Beliau merupakan CEO E-Dinar Ltd yang beribu pejabat di Dubai.
- 2 Malaysia bakal menjadi pengilang dinar emas ke enam dunia sekiranya permohonan e-dinar daripada kerajaan Malaysia diluluskan kelak. Antara tempat yang dicadangkan ialah Labuan dan Kuala Lumpur, sila lihat Utusan Malaysia pada 22 Januari 2008.
- 3 Bank of England berperanan sebagai *kustodian* iaitu sebagai alat perantaraan atau orang tengah.
- 4 Berita berkenaan pelaksanaan sistem ini dapat dilihat dalam Mushtak Parker (2002), "Malaysia Hopes To Start Using Islamic Gold Dinar In Trade", *Arab News: Saudi Arabia's First English Language Daily*, 25 November 2002.
- 5 Contohnya; sekiranya setiap akaun ada baki dinar emas dan dirham secara fizikal. Jika baki dalam akaun ialah 1000 dinar emas, maka di dalam bilik simpanan selamat disimpan emas seberat yang bersamaan dengan 1000 dinar. Sekiranya berat satu dinar 4.25 gram maka, di dalam peti selamat ada disimpan 4250 gram emas.
- 6 Menurut Dr Zeno Dahinden (2008), Malaysia menjadi pilihan tempat pelancaran e-dinar pada tahun 2000 kerana pada masa itu bersesuaian dengan usaha Tun Dr. Mahathir Mohammad untuk memperkenalkan dinar emas kepada masyarakat. Tun Dr Mahathir yang merasmikan pelancaran e-dinar yang diadakan di Muzium Kesenian Islam, Kuala Lumpur pada November 2000.
- 7 Koperasi Permodalan Melayu Johor merupakan salah satu wakala Islamic Mint yang terdapat di Malaysia.
- 8 Nama syarikat ini ialah Public Fine Gold International Sdn. Bhd.. Alamatnya: **Public Fine Gold International Sdn Bhd** (818840-U),12E Ground Floor, Jalan Rumbia,11900 Bukit Jambul, Penang. Tel : 04-644 9999. Nama pendeknya

- ialah Public Gold. Untuk maklumat lanjut boleh layari laman web Laman web syarikat Public Gold di **[www.publicgold.com.my](http://www.publicgold.com.my)**
- 9 Terdapat dua cara pembelian emas ini sama ada pembelian terus di syarikat ini berpusat di Pulau Pinang atau Public Gold akan menghantar kontrak melalui emel atau fax kepada anda. Anda perlu tandatangan kontrak ini dan hantar balik kepada Public Gold. Untuk pembayaran pula, anda boleh bayar 30% deposit daripada harga emas tersebut dan bakinya dijelaskan ketika menerima emas ataupun bayar 100% sewaktu order emas tersebut (bank-in ke dalam akaun bank Public Gold). Untuk keterangan lanjut, anda boleh refer cara membeli di sini: <http://www.publicgold.com.my/content/view/39/69.html>.
  - 10 Setiap pembelian dinar emas Public Gold akan disertakan dengan sijil ketulenan.
  - 11 Umar Azmon Amir Hamzah merupakan Pengarah Urusan Dinar Dirham International Sdn Bhd

## Rujukan

- Ahmed Kameel Mydin Meera. 2002. *The Islamic gold dinar*. Kuala Lumpur: Pelanduk Publications (M) Sdn Bhd.
- Ahmed Kameel Mydin Meera. 2003. *The theft of nation: Returning to gold*. Kuala Lumpur: Pelanduk Publications (M) Sdn Bhd.
- Anon. 2008. Dinar emas masih gagal direalisasikan. *al-Islam*. Bil. 37. Januari. Kuala Lumpur: Utusan Publication.
- Hakimi Ibrahim. 1999. Mata wang Islam-Bila lagi?, *Utusan Malaysia*, 22 Januari.
- Hakimi Ibrahim. 2004. History of the gold dinar and its philosophy. *Gold Dinar Workshop*. Universiti Kebangsaan Malaysia. July 30.
- Hamidi M Lutfi. 2007. *Gold Dinar: Sistem monitor global yang stabil dan berkeadilan*. Jakarta: Senayan Abadi Publications.
- Hasanuddin Abdul Aziz. 2005. Globalisasi dinar emas dan dunia Islam, *Pemikir*, bil. 35 (Jan-Mac 2005)
- Imran N. Hosein. 2008. *Dinar emas dan dirham perak: Islam dan masa depan wang*. Kuala Lumpur: Darul Fikir.
- Ismail Daud. 2002. Dr. M Tunggu OIC Kerana Penggunaan Dinar Emas. *Utusan Malaysia*. 29 Jun 2002
- Mahathir Mohamad. 2000. *Krisis matawang Malaysia: Bagaimana dan mengapa ia berlaku*. Kuala Lumpur: Pelanduk Publications.
- Mahathir Mohammad. 2005. Pelaksanaan dinar di Malaysia. KLCC.Temu bual, 25 September.
- Muhammad Nasri Haji Hussain & Azizi Abu Bakar. 2004. Potensi dinar emas sebagai matawang utama dunia: Teori dan praktis. *Prosiding Seminar Kebangsaan Perbankan dan Kewangan Islam 2004*. Kuala Lumpur.
- Muhammad Nasri Hussain & Ishak Abd Rahman. 2004. Mata wang dinar emas sebagai persediaan globalisasi, *globalisasi dalam perspektif: Isu dan cabaran*. Kuala Lumpur.
- Nor Mohamed Yacop. 2002. The Role of central banks in the implementation of the gold dinar proposal. *Seminar Antarabangsa: Gold Dinar In Multilateral Trade*. Institut Kefahaman Islam Malaysia, 22-23 Oktober 2002.
- Nuradli Ridzwan et al. 2004. *The mekanisme of gold dinar*. Kuala Lumpur: A.S Noorden.

- Nuradli Ridzwan Shah Mohd Dali, et al. 2005. *Fiat Money & Gold Dinar Application: An Online Survey*. In COMT 2005 Managing Future Workplaces and Issues & Challenges in the Borderless World. Sunway Lagoon Resot Hotel.
- Rosli Yaakop. 2007. *Gold Dinar: The Kelantan experience*. International Conference On Gold Dinar Economy. Kuala Lumpur: Putra World Trade Centre (PWTC).
- Umar Ibrahim Vadillo. 2002. *The return of the Islamic gold dinar*. South Africa: Madinah Press.
- Utusan Malaysia. 2001. Satu Mata Wang Asia Sukar Dilaksana, 5 Jun 2001.
- Utusan Malaysia. 2002. Malaysia Guna Dinar Emas Dengan Tiga Negara Asia Barat, 2 Mei 2002.
- Utusan Malaysia. 2003. Royal Mint Temui Empat Institusi Kewangan Perkenalkan Dinar, 29 Julai 2003.
- Vennard, W. B. 1969. *Chronological History of Money Since Babylon* Clackamas. DR: Emissary Publications.
- Zeno Dahinden. 2008. Analysis of The World Finance System. Interview, November.
- Zuhaimy Ismail (2003), *Kembalinya dinar emas dan dirham Perak*. Johor: UTM Skudai.
- KPMJ Gold Sdn Bhd. (2006), *Risalah Syarikat*. Johor: KPMNJ Gold Sdn Bhd
- [www.dinarkel.com](http://www.dinarkel.com) 23 Feb 2009
- [www.logamulia.com](http://www.logamulia.com). 23 Feb 2009
- [www.publicgold.com.my](http://www.publicgold.com.my), 10 Ogos 2009
- [www.webdinar.com](http://www.webdinar.com), 10 Ogos 2009

